

Ich bin ä Kind vun de Kurpfalz. Do kumm isch her, un do will isch immer sei.

Ich bin ä Kind vun de Kurpfalz.

Wuannaschd kähnd isch gohnet lehwe und ich bass oh net wuanaschd nei.

Ich kenn de Waldhof unn sei Buhwe, ich kenn die Heidelberger Leid.

Oh zum Kaiserdom en Speyer ischs vun uns aus gohnet weid.

un noch Schwetzinge do fohr isch faschd jeden Muhnet so u'gfähr

du em Schlossgohde rumlohfe, als wann ich de Kurfürschd wär.

Es gibt sou viel schähne Pletzlin, do bei uns dähoim.

Do gibts immer was zu sehe, fa mich isch des en Drohm.

Mei wunnaschähni Kurpfalz, die isch ma lieb un deier.

Egohl ob Sinse oder Dielsberg, ob Wiesloch oder Speyer.

Ich gäi uff Lohdeburg en'd Altstadt, sou oft ma mich grohd lest.

Ja do hods lauder alde Sache, weil dort sinn schun die Römer g'west.

Ich foh noch Ofdasche un Plankschd, uff Ketsch oder uff Briehl.

En de Kurpfalz do gibt's alles, ja die Kurpfalz die hot Stil!

Ich bin ä Kind vun de Kurpfalz. Do kumm isch her, un do will isch immer sei.

Ich bin ä Kind vun de Kurpfalz.

Wuannaschd kähnd isch gohnet lehwe und ich bass oh net wuanaschd nei.

Groß- un Litzelsachse, die sinn schun ä Stick weit weg.

Un wann dann noch mimm Fohrrod fehrsich, isch des schun ä schähni Streck.

Dohdefor gibt`s dort oh Berge. Ja des isch ä schähns Stick Land.

Un die Gegend isch oh jedem als Bergstrohs wohlbekannt.

Im Norden gäids noch Hesse nei, em Weschde en die Palz.

Dort griggsch du guhdi Medizin gehe dein druggische Hals.

Em Oshde isch de Oudwald un oh noch s'Neckardohl.

Ja oh Mosbach und Bad Wimpfe, die sinn vun uns en Dohl.

Ja die Kurpfalz die ich grouß, und die isch oh ganz schäh weit.

Un des allerbeschde isch, do gibt`s en Haufe tolle Leid.

De Friedrich Ebert kummt vun do un oh die Sylvia.

Ich mohn die Kähnischin vun Schwede, awwa des isch eisch jo klar!

Ich bin ä Kind vun de Kurpfalz. Do kumm isch her, un do will isch immer sei.

Ich bin ä Kind vun de Kurpfalz.

Wuannaschd kähnd isch gohnet lehwe und ich bass oh net wuanaschd nei.

Die Erna Strube hot als Joy Flemming sou schäh g`sunge.

Die Songs of Joy die hewwe all sou wunnaschäh geklunge.

Oh dass die Steffi Graf vun Briehl stammt isch fa uns all ä groußes Glick.

Un aus Mückeloch, do kummt de Hansi Flick.

Links un rechts vum Rhein, do wächst alles und gedeit.

Do wachse Spargel un Kartoffel, un do gibt`s lauder gscheide Leid.

Oh zu Trinke gibt`s bei uns genug. Mir hewwe Bier, mir hewwe Wei.

En de Kurpfalz do gibt`s alles. Es kähnd gohnet schähner sei!

Wenn du`s Beschde vun de Palz un vu Bade zamme dusch.

Kummt unnam Strich die Kurpfalz raus. En Platz wu`hd ohfach bleiwe musch.

Sogoh wannnd ford gäisch un mohl weg bisch, dann kann isch da ohns sohre.

Dann dudd dei Herz, sou isch`s halt mohl, en de Kurpfalz weider schlohre.

Ich bin ä Kind vun de Kurpfalz. Do kumm isch her, un do will isch immer sei.

Ich bin ä Kind vun de Kurpfalz.

Wuannaschd kähnd isch gohnet lehwe und ich bass oh net wuanaschd nei.